



CERA CONOCI CU SINGING OLIVIA SU C.D. TA NA CAMINDA

** No ta falta mucho dia pa e prome disco compacto di e conocida cantante SINGING OLIVIA lo ta na Aruba. Ta trata di un produccion cu ta contene e musica caribense soca varia cu e toke di reggae y disco.

E disco compacto lo hiba e titulo "Hot Like Pepper", mas cayente cu Madam Jeanet. Riba e C.D. lo aparece siete di e cancionnan mas cayente cu pepper.

E produccion aki ser realiza den Cristal Sound Factory, bao direccion di Hubert Thiel como areglista y ingeniero di studio. Singing Olivia mes a compone tur e cancionnan, cua tur ta di su propio creativad.

Durante un entrevista exclusivo cu Singing Olivia, el a declara na DEN AMBIENTE, cu e ta masha contento cu su prome C.D., cual produccion lo bay ser promove den exterior. Ya caba tin contactonan establece na St. Maarten, St. Eustastius, Anquilla, Trinidad, New York, Orlando, Florida y varios paisnan pendiente. Naturalmente Corsow y Bonaire tambe e C.D. aki lo ser distribui.

Singing Olivia no ta un cantante desconoci tanto aki na Arubay Islanan Ariba. Su number mes ta Olivia Martha Murray. Olivia a nace na San Nicolas, Aruba.

Singing Olivia a inicia cu su carera artistico na aña 1979, formando parti di Musical Time. Hunto cu Musical Time el a participa varios biaha den e Calypso & Roadmarch Contest, den cual el a logra di cay den finalista den varios ocasion.

Na aña 1983 Olivia Murray a logra di conquista e titulo di VOZ DI ORO durante e prestigioso Festival di O.T.I. For di e momento ey, Olivia su portanan a habri den e mundo di farandula.

Na aña 1984 riba invitacion

di e organizadoman di carnaval di Rotterdam, Hulanda, Singing Olivia a realiza un exitoso gira hunto cu Edgar Connor y su Steel Orchesta.

Despues Singing Olivia a bay establece su mes na St. Maarten na unda el a permanece pa diez aña. Durante su diez aña na St. Maarten, Olivia a presenta como cantante solista den diferente restaurant y hotelnan prominente.

Na aña 1986 Singing Olivia a logra un titulo historico durante e Roadmarch Contest, como e prome Roadmarch Queen. Porcierto te ainda ningun dama cantante no a logra di conquista e titulo aki.

Tambe Singin Olivia a participa den un festival internacional, na unda tabatin participacion solamente di cantantenan femenino. E competencia aki tabata uno sumamente fuerte pa Singin Olivia, debi cu e meste a competi cu cantantenan di renombre mundial manera e.o. Natasha (yiu di Sparrow), Singing Sandra (Trinidad) y varios mas di peso. Durante e competencia di halto nivel y caliber aki, Olivia orguyosamente a sa di clasifica na di cuater lugar.

Pero apesar cu Singing Olivia tabata residencia na St. Maarten, toch el a keda coopera cu varios participantenan cu su composicionnan manera e.o. Long Roy (Juke a Soul), Mighty G.R. (Frega Pia) y hopi mas.

Na aña 1993 Olivia a dicidi di bin establece su mes back riba su isla natal Aruba. Back na Aruba mesora Olivia a ricibi un oferta for di Eduardo Maya y su Orquesta pa presenta tur anochi den e prestigioso Hyatt Casino. Esaki no tabata facil pa Olivia, ya cu e mester a ensaya den un tempo record

e repertorio musical di e orquesta, cua tabata salsa, merengue, vallenato, cumbia, montuno y balada.

Na aña 1994 Olivia a participa despues di un ausencia di 11 aña, den e Calypso & Roadmarch Contest, na unda el a interpreta e calypso "Woman", cu a cuasa un impacto grandi, pero lastima no a gana. Su roadmarch "This is the way we like it", cu tambe a causa furor durante e paradanan.

Na aña 1995 pa motibo di tabata hopi ocupa cu su compania di entertainment Sait Production, e no a participa durante e Calypso & Roadmarch Contest. Pero den e mesun aña Singing Olivia a compone e jingle ganador di "One Cool Summer". E jingle aki a ser canta pa Tatoo y su persona y aregla pa Hubert Thiel.

E aña aki si Singing Olivia a bin anto duro cu su calypso "Aruba" cu a hera di gana clasificando como prome finalista. Tambe Singing Olivia tabatin exito cu su roadmarch "Jump and Scream", cu a conquista di cuater lugar.

Pues aki ta trata di un cantante cu tin un trayectoria hopi exitoso y cu tin su amplio experiencia pa lansa un produccion riba halto nivel y caliber.



Por a compronde for di Singing Olivia cu e prome lote di e C.D. lo ta na Aruba den transcurso di otro siman. Ta di spera cu esaki lo bay

cay na agrado di henter e pueblo di Aruba, cua el a hasi cu un AMOR MAS CAYENTE CU MADAM JEANET...

MUY PRONTO E CD DI KING COMPUTER LO TA NA ARUBA

** Muy pronto e prome disco compacto di King Computer lo yega Aruba.

Recientemente King Computer a termina cu su ultimo tokenan pa finalisa su produccion. Riba e C.D. cu lo hiba e titulo di "Hard To Get", lo bay aparece 10 cancion cua ta inclui su road-

march ganador "All The Way" di aña 1993.

Actualmente ya tin dos ta zona na nos radio-emisoranan. E grabacion a ser graba den Aruba Recording Studio y produci pa Michael Odor. Pues spera e C.D. di King Computerrr.

